

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 475954 24 St
Tuzla, 12.03.2026. godine

Općinski sud u Tuzli, stečajni sudija Vedran Milašinović, u stečajnom postupku nad stečajnim dužnikom „Rajska Gradnja“ d.o.o. za građevinarstvo, trgovinu i usluge Gradačac, Rajska b.b., nakon provedenog stečajnog postupka, donio je dana 12.03.2026. godine sljedeće:

RJEŠENJE

OTVARA SE stečajni postupak nad imovinom dužnika „Rajska Gradnja“ d.o.o. za građevinarstvo, trgovinu i usluge Gradačac, Rajska b.b., matični broj subjekta 32-01-0209-20, JIB: 4210434430002, račun broj: 1323002023294778 otvoren kod NLB banka d.d. Sarajevo.

Za stečajnog upravnika imenuje se Hazim Huskić iz Gradačca.

ZAKLJUČUJE SE stečajni postupak nad imovinom dužnika „Rajska Gradnja“ d.o.o. za građevinarstvo, trgovinu i usluge Gradačac, Rajska b.b., zbog nedostatka stečajne mase za pokriće troškova stečajnog postupka.

Rješenje će se objaviti na oglasnoj tabli suda, web stranici suda, Službenim novinama F BiH, te dostaviti FIA.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjelenju registra ovog suda, radi brisanja stečajnog dužnika iz sudskog registra.

Obrazloženje

Rješenjem Općinskog suda u Tuzli broj: 32 0 St 475954 24 St od 28.03.2024. godine, pokrenut je prethodni postupak radi utvrđivanja uslova za otvaranje stečajnog postupka nad imovinom društva „Rajska Gradnja“ d.o.o. za građevinarstvo, trgovinu i usluge Gradačac, Rajska b.b., a za privremenog stečajnog upravnika imenovan je Hazim Huskić iz Gradačca, sve temeljem odredaba člana 61 Zakona o stečaju (Sl. novine F BiH 53/21).

Privremeni stečajni upravnik dostavio je izvještaj o provedenom prethodnom postupku ovom sudu dana 16.05.2025. godine. Iz izvještaja privremenog stečajnog upravnika i navoda datih na ročištu proizilazi da je društvo prestalo sa obavljanjem djelatnosti septembra 2023. godine zbog poremećaja na tržištu uzrokovanih pandemijom Corona virusa. Bankovni račun društva je blokiran u kontinuitetu od 24.05.2022. godine. Radnici društva su objavljeni tokom 2023. godine. Iz uvjerenja PU F BiH proizilazi da društvo ima neplaćenih obaveza po osnovu direktnih poreza u iznosu od 33.408,64 KM, a iz uvjerenja UIO BH proizilazi da društvo ima obaveza po osnovu indirektnih poreza u iznosu od 22.540,05 KM. U poslovnim knjigama dužnika su evidentirane kratkoročne obaveze u iznosu od 98.655,00 KM (prema dobavljačima, po uzetim kreditima i sl.), s tim da prema izjavi direktora ovo nije odraz stvarne visine dugovanja jer je dio duga izmirio iz lične imovine, tako da bi se tačan iznos obaveza mogao utvrditi tek po otvaranju stečajnog postupka na osnovu prijave potraživanja. Stečajni dužnik u svom vlasništvu nema nepokretnosti, osnovnih sredstava, repromaterijala, zaliha, novčanih sredstava. Od imovine koja bi mogla činiti stečajnu masu društvo posjeduje dva motorna vozila i to; putnički kombi marke Volkswagen, reg. oz. K64-T-611, godina proizvodnje 1990, i teretni kombi marke Volkswagen, reg. oz. T98-J-885, godina proizvodnje 1999., na kojima kod MUP-a TK postoji evidentirana zabrana otuđenja po nalogu UIO BH. U prethodnom postupku je izvršena procjena vrijednosti ovih vozila od strane ovlaštenog procjenitelja Adila Bašića koji je vrijednost putnički kombi marke Volkswagen, reg.

oz. K64-T-611, godina proizvodnje 1990 procijenio u visini od 609,28 KM, a vrijednost teretni kombi marke Volkswagen, reg. oz. T98-J-885, godina proizvodnje 1999 u visini od 2.704,80 KM, što zbirno daje iznos od 3.304,08 KM, a ukoliko bi se vrijednost posmatrala kao cijena sekundarnih sirovina (u slučaju unovčenja po ubrzanoj likvidacionoj prodaji) ista bi zbirno za oba vozila iznosila 1.024,50 KM. Provjerama u registru zaloga kod Ministarstva pravde BiH utvrđeno je da za navedena vozila n isu registrovani zalozi.

Dakle, sud nalazi da podnosilac prijedloga za otvaranje stečajnog postupka nije podnio prijedlog u roku od 60 dana od dana nastupanja platežne nesposobnosti (prijedlog podnesen 11.12.2024. godine), da postoji stečajni razlog za otvaranje stečajni postupka predviđen članom 6 stav 2 i članom 102 Zakona o stečaju.

U smislu odredbe člana 103 stav 1 Zakona o stečaju, a u vezi sa odredbom člana 102 stav 7 Zakona o stečaju F BiH, a budući da dužnik ne raspolaže sredstvima za vođenje stečajnog postupka iz kojih bi se mogli podmiriti troškovi stečajnog postupka, sud je rješenjem od 29.07.2025. godine pozvao predlagača, povjerioci i sva zainteresovana lica da u roku od 30 dana od dana objavljivanja poziva u službenim novinama uplate iznos od 3.195,92 KM na ime otvaranja stečajnog postupka, iz kojeg predujmljenog iznosa bi se pokrili troškovi stečajnog postupka. Naime, procijenjeni minimalni troškovi za otvaranje i vođenje stečajnog postupka su prema specifikaciji privremenog stečajnog upravnika iznosili 7.130,00 KM, tako da bi i po pretpostavkom unovčenja motornih vozila po višoj varijanti od 3.314,08 KM, te uzimajući u obzir iznos sredstava preostao izi prethodnog postupka, to je na ime razlike do visine minimalnih troškova otvaranja i vođenja stečajnog postupka bilo potrebno uplatiti na ime predujma iznos od 3.195,92 KM.

Rješenje kojim se pozivaju predlagač, povjerioci i sva zainteresovana lica, objavljeno je u Službenim novinama F BiH broj 63/25 dana 20.08.2025. godine, oglasnoj tabli suda dana 30.07.2025. godine i na web stranici suda, kojim se objavama javni poziv smatra dostavljenim.

S obzirom da u ostavljenom roku koji je propisan zakonom predlagač, povjerioci ili neko od zainteresovanih lica nisu izvršili uplatu predujma za obezbjeđenje troškova stečajnog postupka, sud je u smislu odredbe člana 102 stav 8 Zakona o stečaju, donio odluku o otvaranju i zaključenju stečajnog postupka, na način određen u izreci rješenja.

Temeljem odredbe člana 102 stav 8 Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBIH i Upravi za indirektno oporezivanje BiH.

Nadalje, temeljem odredbe člana 204 stav 1 i 3 Zakona o stečaju, a u vezi sa odredbom člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama F BiH te dostaviti FIA, dok je odredbom člana 204 stav 2 istog zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama F BiH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

Na osnovu odredbe člana 206 stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102 stav 8 Zakona o stečaju sud je odlučio kao u izreci rješenja.

Stečajni sudija
Vedran Milašinović

POUKA O PRAVU NA IZJAVLJIVANJE PRAVNOG LIJEKA:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 dana, od dana objavljivanja rješenja u Službenim novinama.